

## NYUMBA YA HAKI YA ULIMWENGU

9 Mei 2020

Kwa Mabaraza yote ya Kiroho ya Kitaifa

Marafiki wapendwa sana,

Kama ambavyo hadi sasa dhamira yote ilivyo dhahiri kabisa, mwaka wa mwisho wa Mpango wa Miaka Mitano umeleta changamoto ambazo ni tofauti na zile za miaka minne iliyotangulia. Ulimwengu umenaswa katika nguvu ya ueneaji wa haraka wa virusi ambavyo vimegharimu maelfu kwa maelfu ya maisha na kuvuruga vibaya sana sehemu kubwa ya shughuli za kijamii na za kiuchumi za binadamu. Bado jumuiya ya Kibahá'i imebakia tulivu na makini na imetenda kwa haraka ili kutimiza matakwa ya haraka yanayoikabili. Imetafuta njia ili kuhakikisha uendeleaji wa maisha ya kijumuiya, wakati huo huo pia ikipambana kutimiza jukumu lake katika kufikia mahitaji ya kiroho na ya kimwili katika jamii kwa mapana zaidi—muitikio unaostahili katika hali ya dharura. Tunasifu hatua zote zilizokwishachukuliwa hadi sasa. Sasa, hata hivyo, tunapenda kuchunguza kwa ukamilifu zaidi kile ambacho mwaka ujao unaweza kukihitaji. Jitihada zenu kuchochea maendeleo ya Mpango katika miezi yake ya mwishoni pasipo kuepikika zitabumbwa na jukumu lenu nyeti la kuwaongoza marafiki katika muitikio wao kwa janga likualo pole pole la kiulimwengu. Mazingira haya ya kipekee yanahitaji kwamba tuwaelezee ninyi moja kwa moja; mnaweza kushirikiana yote au sehemu ya barua hii pamoja na jumuiya zenu, kama mtakavyoona inafaa.

Tulipoelezea shauku yetu ya kuona program elfu tano za ukuaji shadidi (wa nguvu) zikianzishwa ifikapo mwishoni mwa Mpango huu wa Miaka Mitano, tulifahamu fika kabisa juu ya ukubwa wa kazi ambayo hili lingemaanisha, lakini hali ya ulimwengu ilihitaji. Tulitoa wito kwa ajili ya kuchapuzwa kwa kazi ya uimarishaji wa program za ukuaji kila mahali. Tulifurahishwa kuona jinsi wasaidizi wa Hoja walivyoamshiwa kwenye utendaji, wakijitahidi kutumia viwango visivyo kifani vya juhudi. Katika kipindi cha miaka minne jumuiya ya Kibahá'i imezidisha mara mbili yote mawili; idadi ya shughuli za msingi zinazotokea kote ulimwenguni na idadi ya washiriki wao. Kuyaleta mamia kwa maelfu ya watu binafsi kwenye ukumbatiaji wa shughuli za jumuiya katika kipindi kifupi kama hicho ni kupiga hatua kiuwezo ambao hauna ulinganisho na wowote wa Mpango ya hapo awali katika mlolongo wa sasa.

Mengi, basi, yametimizwa na hiki ni kiashirio dhahiri cha nguvu na ujasiri wa jumuiya ya Kibahá'i. Lakini, kama tayari mtambuavyo, janga la sasa limebadilisha maudhui ambayo kwayo Mpango unatekelezwa. Tumefurahishwa kwa jinsi jumuiya nyingi zilivyopiga hatua za maendeleo makubwa na ya haraka katika kujirekebisha kufuatana na uhalisia huu mpya. Mbali na kukiona kipindi cha sasa kama pengo tu la kulistahimili kwa uvumilivu, zimetambua kwamba hali ya ulimwengu imesababisha haja ya kutoa huduma ya yenye tija kwa jamii ya binadamu kuwa ya

haraka zaidi. Kwa kawaida, shughuli zinazotekelezwa lazima zikidhi hali zilizopo, lakini pasiwe na shaka kwamba huu ni wakati kwa ajili ya shabaha bora, azma kuu, na jitihada shadidi. Kama ifahamikavyo vyema, shughuli za Mpango zimekusudiwa kukuza ari yenye usitawi ya jumuiya, ambayo kupitia hiyo unyumbulikaji kwa changamoto kubwa pia huimarishwa. Jitihada za kielimu zenye shabaha ya kuinua idadi ikuayo ya roho ambazo zinaweza kuchangia kwenye usitawi wa kiroho na kimwili wa jumuiya; mikutano ya ibada hulea moyo wa huduma kadiri inavyositawi, ikijikita mizizi katika utamaduni wa ibada ya pamoja. Kwa kifupi, uendelezaji wa Mpango humaanisha kujenga uwezo wa kutembea katika njia ya huduma kila wakati na msimu—ambapo lazima kwa hakika kujumuishe nyakati za hatari kubwa katika maisha ya mwanadamu, kama ilivyo sasa. Ni muhimu, basi, kwamba hatua zinazochukuliwa kujifunza jinsi ya kutumia muundo wa Mpango wa utendaji kwa mazingira ya sasa ya ulimwengu ziendelee kwa bidii kubwa; katika uwezekano wote, janga la kiafya la kiulimwengu litakuwa na athari ya moja kwa moja juu ya shughuli za Kibahá'i, kwa kiwango kikubwa au kidogo zaidi, kwa miezi au hata miaka, na kazi ya kujirekebisha kulingana na hali haiwezi kuahirishwa. Kuhusiana na hili, Washauri wa Bara na wasaidizi wao, wakiongozwa kwa ustadi mkubwa na Kituo cha Ufundishaji cha Kimataifa, wameonyesha dhamira inayochochea hisia za ndani katika jitihada zao kuwahimiza marafiki na kuwaelekeza katika mbinu zao kwa kazi iliyopo mbele yao; bila shaka watafanya vivyo hivyo kwa duru nne zijazo na zaidi.

Tunatambua, bila shaka, kwamba baadhi ya shughuli zililazimika zisitishwe, na mikakati au njia mahsusi ambazo hazifai kwa hali ya sasa zilibidi ziwekwe kando kwa muda. Hata hivyo, wakati uwezekano fulani fulani umefungwa kwa muda, mwingine umefunguka, na njia mpya zimeibuka kwa ajili ya uimarishaji wa mitindo ya sasa ya shughuli. Unyumbulikaji umethibitisha kuwa hazina, lakini vivyo hivyo na tahadhari katika kuhakikisha kwamba tabia za kimsingi za mahali za shughuli za jumuiya hazifilishwi; juhudi za kulea jumuiya zinazoshamiri ndani ya ujirani na vijiji na katika klasta nzima lazima ziendelee. Kwa baadhi ya mazingira, hali za sasa zimetengeneza fursa ambazo hazikutarajiwa kwa ajili ya kupanua ushiriki wa jumuiya katika mikutano ya ibada na vikundi vya mafunzo, zikiendeshwa huku kukiwa na usalama akilini. Wazazi wengi ambao familia zao zimezuiliwa kwenye mazingira ya nyumbani wamekaribisha msaada ambao umewasaidia kuhama kutoka kuwa watazamaji hadi kuwa wahusika wakuu katika elimu ya kiroho ya Watoto wao. Vijana chipukizi na vikundi vya vijana wamegundua uwezo wa matendo rahisi ya huduma yenye huruma yafanywayo kwa hekima. Hata hivyo, kama mkidhamiria, kwa baadhi ya mazingira, ingeeleweka kwamba mipango inayohitaji kuhama kwa watangulizi, wakufunzi wahamao au walimu watembezi itapaswa iahirishwe, na hili lisiwape sababu ya kuwa na wasiwasi, mnaweza kutathmini upya hali itakavyokuwa miezi ya hapo mbele. Mpango ujao wa Mwaka Mmoja ungebeba fursa ya kutimiza malengo au mambo yoyote ambayo mwishowe yanaweza kubakia yasiyofikika katika Mpango wa sasa.

Tunatambua kwamba kuendelea kufanya kazi katika kipindi hiki cha majanga, kwa namna nyingi kutawaweka katika mashaka ya kifedha, na dhiki ya kiuchumi inayopitiwa na wengi katika jumuiya inaweza kubinya rasilimali ambazo kwazo mnachota. Muwe na hakika kwamba tunasimama kidete kuwasaidia. Hebu pasiwe na shaka au upotoshaji kuhusiaana na jambo hili: ni muhimu kwamba asasi za Imani ziendelee shughuli zao katika kipindi hiki chote na zisikwamishwe na ukosefu wa rasilimali katika kutekeleza majukumu yao ya kimsingi. Bila shaka, kundi lote la waaminifu katika kila nchi watakusanyika kuwazunguka, na hususan, tuna imani kwamba waumini wenye nyenzo watajitokeza kuwasaidia.

Kama mtambuavyo, kuna ukosefu mkubwa wa usawa kwa jinsi ambavyo jamii mbalimbali zinavyovumilia shida zitokanazo na janga hili; kwa sababu hiyo, changamoto ambazo zinayakabili Mabaraza mbalimbali ya Kitaifa hazifanani. Na baada ya muda changamoto hizi zitabadilika. Hii itahitaji unyumbulikahi mkubwa mno kadiri asasi za mahali, za kanda na za kitaifa zinavyotafuta kuusoma uhalisia na kuwa macho kwa maendeleo mapya. Tunapenda kushawishi fikra zenu kwamba ushirikiano wenu na Washauri utakuwa wa umuhimu mkubwa sana: unapaswa ujidhatiti na kuendelezwa, takriban mabadilishano thabiti ya taarifa na umaizi, ili kuhakikisha kwamba mnaitikia kwa haraka kwenye mahitaji ya jumuiya yenu, kutazamia matatizo kabla hayajaibuka, kuwinda fursa zinazofunguka, na kuunga mkono jitihada zinazoleta matumaini. Ni hatua gani hasa zinazopaswa kuchukuliwa na asasi za Kibahá'i kwa kawaida itategemea na mazingira husika. Lakini kila mahali, marafiki watahitaji muongozo dhahiri na wa wakati; uangalifu maalum lazima utolewe kwa wale ambao wapo katika hatari zaidi ya kupata virusi vyenyewe au kutokana na athari za kiuchumi za usambaaji wake; na njia za kiubunifu zitahitajika ili kudumisha moyo wa pamoja wa jumuiya katika nyakati za masahibu. Mitandao ya aina mbalimbali ikiundwa na familia, kaya za ujirani au makundi mengine inatoa msaada wa thamani kwa wengi; muwe na imani na welekevu wa jumuiya zenu na mtafute kuchota vipaji na nguvu zao kikamilifu. Kadiri ambavyo tayari hali imekuwa mbaya zaidi kwa baadhi ya sehemu, Mabaraza ya Kitaifa katika nchi ambazo hadi sasa zimepata madhara mabaya zaidi ya gonjwa hili lazima yakumbuke kwamba kuna uwezekano wa kutokea madhara mabaya zaidi, na maandalizi yoyote yanayoweza kufanywa sasa kwa ajili ya hatima hiyo, kabla vizuizi zaidi havijawekwa vitakavyokwamisha jitihada hizo, yanapaswa yaanze mara moja—bila hadhari, lakini bila kuchelewa. Mabaraza ya Kiroho ya Mahali hususan yanapaswa yafikirie ni njia gani zilizo ndani ya uwezo wao za kuzuia, kufariji au kupunguza ukali wa mateso katika jamii pana ambayo kwayo wao ni sehemu yake.

Wakati jamii inapokuwa katika shida na mateso kama haya, wajibu wa Wabahá'i kutoa mchango wenye kujenga kwa ajili ya mambo ya binadamu hutangazwa wazi zaidi. Huu ni wakati ambapo mbinu tofauti tofauti lakini zinazohusiana za kiutendaji hukutana mahali pamoja, wakati mwito kwa ajili ya huduma hugonga kwa sauti. Mtu mmoja mmoja, jumuiya na asasi za Imani—wahusika wakuu wasioweza kutenganishwa katika uendelezaji wa ustaarabu—wana nafasi ya kuonyesha sura mbalimbali za namna ya maisha ya Kibahá'i, zikijipambanua kwa ukomavu uongezekao katika utekelezaji wa majukumu yao na katika uhusiano wao mmoja kwa mwingine. Wanaitwa kuelezea kikamilifu zaidi uwezo wa Imani wa ujenzi wa jamii. Mawakala na miradi iliyowekwa wakfu kwa ajili ya vitendo vya kijamii wanaweza kurekebisha mbinu zao ili kukidhi mahitaji yaliyopanuka; jitihada za kufanya hili zina uhakika wa kuziijaza program zinazoendelea maana na kusudi la ndani zaidi. Zaidi, michango ya Wabahá'i kwa mijadala inayoibuka upya katika jamii inatoa shauku ya hali ya juu, na kuna wajibu wa kujihusisha hapa vile vile. Wakati ambapo uharaka wa kufikia viwango vya juu zaidi vya umoja, ukiegemezwa juu ya ukweli usiopingika wa umoja wa jamii ya binadamu, unapokuwa dhahiri kwa idadi kubwa, kubwa zaidi, jamii huwa katika uhitaji wa sauti dhahiri ambazo zinaweza kuelezea kwa ufasaha kanuni za kiroho ambazo zimo katika hamu hiyo.

Bila shaka mnatambua daima kwamba wajibu wenu hufika mbali zaidi ya ule wa usimamizi wa masuala ya jumuiya na kuelekeza nguvu zake kwenye utimizaji wa malengo makuu; mnatafuta kuinua utambuzi wa zile nguvu za kiroho ambazo zipo kwa kila muumini aliyehakikishwa na

ambazo lazima zielekezwe katika saa ya kuhitajika. Ni nguvu hizi hizi ambazo huijaalia jumuiya unyumbulikaji, kuihakikishia uadilifu wake na kuendelea kuelekeza kwenye kazi yake maalum na takatifu ya kuhudumia jamii ya binadamu na kuinua muono wake wa siku za baadaye.

Haiwezekani kutabiri kiwango ambacho gonjwa hili litashawishi mjongeo wa kuelekea umoja miongoni mwa mataifa. Lakini hakuna shaka kwa vyovyote kwamba, kwa juhudi za jumuiya ya Kibahá'i, miezi iliyo mbele yetu itakuwa ya kufuatana. Kwa hakika, ni nadra kwamba iwe vinginevyo. Mwaka huu wa mwisho, wa Mpango wa mwisho, katika mlolongo unaopelekea robo ya mwisho ya karne ya kuanza kwa Zama za Utungo, utahitimisha msingi ambao juu yake utawekwa mlolongo ufuatao wa jitihada za kiulimwengu. Ni kitendo kinachohitimisha katika mfululizo wa matukio ya kuvutia mno ambayo hatima yake bado haijulikani.

Haupiti muda ambapo hampo katika mawazo yetu. Imani na matumaini yetu yote katika uwezo wa kukabiliana na changamoto hizi hutokana na utambuzi wetu kwamba muungaji mkono na msaidizi wa mwisho ni Uzuri wa Abhá Mwenyewe. Katika maombi yetu kwenye Vizingiti Vitakatifu, tunamsihi Yeye awafanye michirizi safi/mitakatifu kwa kwa ajili ya utiririkaji wa rehema na neema Zake kwa jamii ya binadamu.

[Imesainiwa: Nyumba ya Haki ya Ulimwengu]

Nakala: Kituo cha Ufundishaji cha Kimataifa  
Bodi za Washauri  
Washauri